

陶樓文鈔

陶樓文鈔卷第七

貴筑黃彭年

皇清誥封資政大夫呂府君墓誌銘

呂氏在宋爲中原文獻之宗南渡後聚居伊洛間明永樂始遷甯陵司寇公諱坤者明代大儒世所稱新吾先生者是也嘉靖中字鶴樓者徙居永城七傳而至君舒府君以儒學世其家府君有子曰輝以拔貢得知縣仕於蜀同治初元予在蜀與輝相識年未壯而志學堅定喜直言能規予短予嘗呼爲畏友未幾別去而輝宰冕



甯奉節諸邑政聲大作蜀自道光咸豐以來吏治飢壤盜賊蜂起駱文忠公蒞蜀削平羣盜未遑修治吏事猶幸承宣得人爲之補苴罅漏及文忠沒而繼者非材風氣遂益波靡輝於是時獨能卓然有以自立證以實政錄所言信能守其家學而有聞於道也輝往嘗向予述祖父之訓稱道其行事乃知輝之賢皆府君之教府君隨侍宦遊江南奉養廿年不營祿仕析產讓弟怡怡無閒言其孝友有如此者毘陵友霍秋圃客死梁園斂而葬諸里畔其篤誼有如此者倡率團練堅壁清野擒匪

來擾城賴以全亂定修鄉賢節孝諸祠製生童考棚器
用歲凶輸金助賑其好善有如此者其教煇也手鈔漢
唐以來詩命之讀授五子性理及經濟諸書使之講貫
服習嘗言書足達用而詩可抒懷吾家中原文獻之裔
宜遵祖訓以傳後嗣寢疾彌留猶執煇手以讀書承家
爲戒嗚呼至哉憶予十二歲時先君持新吾先生呻吟
語授予讀之達旦始恍然於學問之道棄養旣久白首
無成今讀煇所爲狀撫躬追悼不禁涕之漣如已府君
諱某君舒其字高祖諱某典簿曾祖諱某 贈奉直大

夫父諱某布政司理問本生父諱某溧陽縣丞並 贈
資政大夫配陳 封夫人子一卽輝湖北候補道府君
以光緒三年十二月初五日卒春秋六十有一輝方歸
省遭喪服除家居養母將以□年□月□日卜葬府君
於城北巴河之陽書來請銘銘曰

樹潛其根枝則繁也水藏其源流則溢也家學之敦宜
子之大其門也

皇清誥封奉直大夫四川鹽源縣知縣加六品銜重赴
鹿鳴陳先生墓誌銘

今上御極之八年湖北舉行壬午科鄉試彭年時權督糧道襄事外闡場故事揭曉次日設鹿鳴宴宴考官及中式諸生於巡撫署其中式已屆周甲之年者巡撫先期聞於朝蒙恩晉秩重赴鹿鳴用彰人文之瑞甚盛典也蘄州陳先生與焉先生與吾先子同歲舉於鄉又同舉進士彭年以年家子謁於旅館退而歎曰仁人也逾年先生卒子桂棻來請銘按狀先生筮仕四川屢權新甯青神樂至諸縣除鹽源縣罷歸其爲治凡勸農教士詰姦聽訟不求赫赫之名而廢者舉弊者革民稱

其慈其在樂至大吏幕賓戚屬有獄語使袒之先生曰
吾不忍欺貧民民稱其剛其在鹽源盜千餘人焚掠梅
邑堡先生調土練剿捕躬冒礮石追至雲南大姚縣人
和場盡殲擒之民稱其勇是役也先生追賊未遑治文
書知府先報以爲己功先生反緣是郢吏議民咸寃之
凡先生宦蹟所至民皆樂爲稱道及其去也則餞送塞
途有哭泣罷市者鹽源民至醵金贈行越時旣久猶有
謀爲入貲復官者乃益歎仁德入人之深而先生斗室
著書里居教授不履城市胡文忠公將以鄉兵擊賊敘

先生功授官不可欲官其子弟亦不可其天懷澹定又
如此吾嘗謂仁者無欲故其動也能行其慈行其剛勇
其靜也能守其天真而世故利祿不足以撓而惑之論
語曰仁者靜又曰仁者壽然則靜固壽之徵歟吾謁先
生年九十有七矣猶殷勤詢問家世手書楹聯見遺我
朝重赴鹿鳴若山舟覃谿鷗北諸老皆近百歲而嗜學
不倦神明不衰先生殆其儔也先生諱廷颺字小坡所
著有周易本義集注十二卷四流山人集八卷蜀遊草
一卷學吟隨錄二卷以光緒九年正月二十八日卒於

家將以某年月日葬於蘄之某鄉某原祖某妣某氏父某貢生妣某氏皆以先生貴誥贈如例配某氏封宜人子桂榮庠生道宜增生道奎監生先卒道萱九品銜桂葵貢生孫十一人曾孫十二人銘曰

九十六年計閏逾百例旌人瑞況文章伯壽考作人髦士承澤型典式里用賓光國千秋萬世視此貞石

封安人章母譙氏墓誌銘

大定章吉士永康隨其兄舉人永孚自京師歸道出貴陽聞母喪匍匐過予乞爲銘墓之文去之家葬有日矣

以狀來告按狀太安人譔氏平遠右族歸首乾先生爲繼室時首乾先生父修職公母吳孺人年皆七十餘吳孺人尤衰年善病太安人供婦職滫瀡甘旨手調而後進吳孺人起動未嘗不侍側中裙廁踰躬親浣滌未嘗委諸人亦未嘗言勞先後居舅姑喪髻踊盡禮旣葬諱日未嘗不流涕祭未嘗不親上食也其仁孝性成類此始首乾先生元配陳太安人生永孚陳太安人卒太安人來歸永孚方襁褓鞠育調衛至成立晨起盥櫛畢輒呼造膝前婉詞勉諭然後予噉飯旣太安人久而無子

以謝太安人備遼室生永康及永迪女子子三人永康
生而孤期年而謝太安人及永迪又相繼歿太安人育
永康如永孚襁褓時每循牆立輒手刻其尺寸加長焉
則喜入塾就傳日必叩所讀夜恆熒熒一鐙率諸女緝
繡坐永康紡車旁執卷就鐙誦率至夜半中夜寢不寐
則促永康覺爲道祖父及親舊中可法事迄二十餘年
子女悉婚嫁舉孫男彭齡永孚昆弟相繼領鄉薦永康
成進士而後太安人泣然泣下心稍愉也嗚呼不慈無
義古傳所戒鵲鳩心一是生淑人若太安人者古賢母

何以過詩曰恩斯勤斯鬻子之閔斯其是之謂歟咸豐
三年八月十一日卒年六十有五以明年三月十五日
耐葬夫新阡義漸里往歲予官京師永康主予家從予
論古文法每歎近世行狀之作詞多溢美自誣其親今
所撰太安人行略婉而詳約而哀質而不誣其述顧復
劬勞之狀讀者輒隕涕嗚呼是可銘已乃爲銘曰
惟鳥之慈匪生伊覆惟薦之生枝以本茂慈母一心式
佑爾後斯理則庸而世罕觀有其觀之予文其壽
清故例授登仕佐郎晉封中憲大夫梁府君夫人秦氏

合葬墓誌銘

卷七

府君姓梁諱生甲字肇乾又字健菴陝西三原人也同治元年五月回亂三原外城陷居民死者甚衆龍橋梁氏爲尤烈從九品曰維先生員曰緝先者府君之子曰梓曰埭曰塢曰壁曰塤曰坳者府君之孫曰密臣曰垣曰坻者府君之從孫維先之妻馬緝先之妻陳密臣之繼祖母周母張姑桂姐妻李及府君之女孫六凡二十有三人事聞天子下詔旌恤與維先雲騎尉世職馬氏以下建坊祠祭有差於是秦之士大夫言節義者翕

然稱梁氏府君盡然傷之亦以悲致疾云經先者府君之仲子也舉甲科自工曹郎直樞垣登御史臺以廉謹聞彭年昔官京師與經先用文章行誼相切劘比來秦經先方家居值府君之喪以書詢喪葬事考古禮準今制行之且語彭年卜葬有日而乞爲文按狀稱府君之孝則曰逮事繼母王不異所生稱府君之友則曰與弟鼎齋自少至老患難流離愛敬不少渝稱府君待宗族之誠則曰猶子緒先倚以成立暫相離輒悲痛嗚咽至稱府君教子孫之嚴則於操守尤諄諄焉其詞約而不

誣嗚呼賢哉語曰身教易從傳曰父兄之教不肅而成
子弟之學不勞而能觀經先之動循禮法與夫二十三
人之子死其父婦死其夫雖其性質有過人者然非涵
濡於義方之訓亦烏能若是之篤至而齊一也梁氏自
明以來世居三原之龍橋故曰龍橋梁氏曾祖彥瑜祖
宮英父昂府君始爲賈入貲得從九品以經先貴封
中憲大夫同治四年七月二十日卒年七十有二配王
早卒繼配秦封恭人母儀婦德戚黨稱之同治二年
二月二十七日卒年六十有六以四年十一月二十四

日合葬於三原北郊線馬堡祖塋之左禮也子六人長
繼先殤存者三一卽經先浙江道御史次日綸先日絀
先皆從九品孫十人存者四曰永泉縣學生員曰珣曰
坪曰堯曾孫一人曰愉曾銘曰
厥草維芳厥木維喬草勁以摧木亦怒號旣哀國殤乃
歌大招厥配耐兮墳岩巍千秋萬古兮風瀟瀟

清故四川三臺縣知縣陳香農先生墓表

同治初元詔大臣薦舉人才於是大學士祁文端公
以獻縣知縣陳崇砥名上特旨引見會文正公督畿

輔復疏舉循吏 詔書褒異天下榮之彭年自咸豐中
遊燕崇砥遣諸子來學比重遊蓮池與崇砥同修畿輔
志朝夕聚處得讀所撰家傳然後知崇砥之爲學與治
皆有淵源而其父香農先生之賢爲不可及先生之宰
鹽亭也始到官卽以飲水茹檠勝其門修學校治水利
百廢具舉其在秀山修城郭建書院創西秀黔彭四學
試院於西陽州士人德之事見西陽州志其在三臺立
保甲緝姦宄懲豪強凡所設施隨宜盡善而尤勤於聽
訟吏民畏懾而未嘗以刑求嘗語人曰觀牘得其半聽